



Nakon terorističkih napada burno na društvenim mrežama

Policija prati govor mržnje na internetu!

SIPA po nalogu Tužilaštva BiH preduzima istražne mjere u slučaju govora mržnje

Policijske agencije u BiH svakodnevno prate poruke u kojima su sadržaji mržnje, a koje se objavljuju na bh. portalima i društvenim mrežama, potvrđeno je jučer za naš list. Naime, uz brojne izraze osude terorističkog napada u Parizu, dio korisnika društvenih mreža posljednjih dana ne preza od najtežih riječi. U Federalnoj upravi policije (FUP), prema riječima Ensada Korman, u čijoj je nadležnosti ova oblast, kažu da uredno evidentiraju ovakve sadržaje.

- Svaka poruka koja sadrži bilo govor mržnje, nacionalnu netrpeljivost ili određene prijetnje uredno se prati, nakon čega se pravi evidencija. Međutim, teško je takve osobe odmah sankcionirati, ali



ih je moguće evidentirati. Sve podatke prikupljamo - rekao je jučer Korman.

S druge strane, u Državnoj agenciji za istrage i zaštitu (SIPA) kažu da u skladu sa svojim nadležnostima po-

stupaju u svim slučajevima u kojima postoje osnovne sumnje da je počinjeno krivično djelo propisano Krivičnim zakonom BiH.

- S aspekta borbe protiv terorizma, SIPA prati aktiv-

nosti na izdiferenciranim internet-stranicama i društvenim mrežama, na kojima se pojavljuju takvi sadržaji, te u saradnji s Tužilaštvom preduzima potrebne mjere i radnje - kažu iz SIPA-e.

Ljiljana Zurovac, izvršna direktorica Vijeća za štampu BiH, izjavila je jučer da su brojni internetski portali, čije je sjedište u BiH, kao i društvene mreže bili preplavljeni stotinama poruka mržnje u kojima su se veličali teroristi i brutalna ubistva.

Upozorila je da je zapanjujuće to što se neki od onih koji šire takav stravičan govor mržnje na Facebooku potpisuju punim imenom i prezimenom. **M.Aš.**